

## Da tailinas e tailunas

GISULA TSCHARNER

gl è bain legher, curius, prest grotesc: Nus avain da vuschar proximamain, sch'in pugn plain dunnas astgan purtar ina taila sur la fatscha u betg (ed igl è bain be ina part da la populaziun svizra che dastga dar la vusch, be quels cun il pass cotschen).

ntant stuainsa pajar ina multa da 200 francs, sche nus giain enturn senza taila sur la fatscha, e quai tuts e tuttas, Christmas e Muslimas e Giudimas e Senzimas (senza religiun definida), dunnas ed umens, e quai gist en il medem temp sco la vuschada. Sch'insatgi vegn anc londe- rora en quest battibugl da tailetas e tailunas ... E per zuppentar la fatscha cun tailina u palpiri stuevan nus gnanc vuschar, igl è vegnì cumandà da surengiu, e (bunamain) tuts fan per cumond. Voilà.

A tgnamain fissi anc detg commod da purtar ina burca, uss ch'i na custa anc nagina multa. Ins pudess simplamain bittar quest vestgì pratic sur l'entira mandura d'enviern avant che ir ord chasa. Lura n'avess ins betg adina problems da drizzar correctamain la mascra, da stuschar quella sut ils eglers en per gea betg avair vaiderets turbels.



A tgnamain datti ina massa situaziuns, en las qualas i fa detg bain da cuvrir la fatscha cun taila. Ussa encunter la fradaglia sin la pista, qua na vesas Ti tar ils uffants absolut nagut pli, gnanc ils eglers betg, cun casc, eglers da skis e bischen sur la bucca e sur il nas. Ubain sche Ti fas in trekking en il desert, lura emprendas ti dals indigens sco emprim da liar la taila alva enturn il chau ed enturn la fatscha, per ta schanegiar da la chalira.

M ia tatta purtava in vel fin sur la fatscha, gionda a far cumpras en la citad. Quest velet era fixà davant la chapella modica, ed ins al pudeva trair engiu ubain drappar enturn la chapella. In vel pli spess portan – e purtavan er en nossa cultura – bleras spusas il di da nozzas. Il vel vegn pir auzà suenter l'insinuaziun, per dar in bitsch al spus. Jau mezza era adina

fascinada da mungias che cuvriavan lur fatscha uschia ch'ins veseva be anc ils eglers, il nas ed in pauet la bucca, ma segir nagins chavels. Quai mussa in tschert respect visavi a l'atgna fatscha, in misteri da la personalitad. Quai stuess ins pudair mantegnair, quella libertad, independent da la cultura. E betg emblidar las mascradas e bagordas: Fatschas zuppadas totalmain!

B ler pli interessant che «fatscha cun u senza taila» ma para l'act da cuvrir u scuvrir la fatscha! Insumma da cuvrir e scuvrir il corp, sa trair en e sa trair ora per bel (quai fan gia ils uffants cun lur poppas), avant e suenter far l'amur u dad ir a durmir. Ed anc pli ferm: Tge faschevan ils carstgauns da la Bibla, cur ch'els entupavan tuttenina Dieu? – I zuppavan la fatscha, ord profund instinct. Percunter tiravan els or ils chalzers. Ed oz anc prendan ils umens giu dal chau lur chapè, entron en baselgia.

L'emprim termagl dal carstgaun è er il pli bel dal mund: il «gugus-dada». Jau cuvrel la fatscha dal pop cun in fazielet, ed el spetga in mument, stira giu il fazielet – ed omadus riainsa da cor.

**Gisula Tschärner è spiritala libra en pensiu, stat a Veulden. Ella viva e lavora cun las plantas selvadias en ed enturn la vischnanca.**